

Nioqqutissanik eqqussuinermi akitsuutit pillugit Inatsisartut inatsisaata allanngortinneqarneranik Inatsisartut inatsisaat (Puulukit nersutaatillu neqaasa akitsuutaannik atorunnaarsitsineq aamma Nioqqutissanik eqqussuineq annissuinerlu pillugit Inatsisartut inatsisaata allannguutaasa malitsigisaannik allannguinerit)

§ 1

Nioqqutissanik eqqussuinermi akitsuutit pillugit Inatsisartut inatsisaanni nr. 19, 30. oktober 1992-imeersumi, Inatsisartut inatsisaatigut nr. 12, 21. november 2022-mi kingullermik allanngortinneqartumi makku allannguutigittinneqarput:

1. § 1, stk. 1, nr. 6 aamma nr. 6 a, oqaasertalerneqarpoq:

”Nr. 6. Puut imeruersaatini imallit tamarmik, tassunga ilanngullugit pikkunarsakkat paarnallu saftii, puut immuk tunngavigalugu imeruersaatini tunisassianik imallit pinnagit, takujulli nr. 6 a.

a) pooq ataaseq ilanngaaseereerluni 0,25 literi tikillugu imalik: 1 kr. 40 øre

b) pooq ataaseq ilanngaaseereerluni 0,25 literi sinnerlugu imalik: 2 kr. 90 øre.

Nr. 6 a. Akileraartussaangitsut tassaapput: Puut immiaaqqanik aamma imeruersaatini sunilluunniit kulsyrimik akullit tuneqqinneqarnissaat siunertaralugu inuussutissarsiortunit sumiiffinnut Qaanaamut, Ittoqqortoormiunut imaluunniit Tasiilamut eqqussorneqartut.”

2. § 1, imm. 1, nr. 13, ima oqaasertaqarpoq:

”Nr. 13. Savaaqqat savallu neqaat taakkunanngalu nioqqutissiat.

a) Nutaat, nillartaatitat, qerititat, tarajortikkat, taratsuni aatsitaniittut, panertut imaluunniit pujuukkat, nioqqutissat allattorsimaffianni 0204.10.00.0-imit 0204.43.00.0 ilanngullugu allassimasut kiisalu nioqqutissat allattorsimaffianni ukunani inissisimasut 0206.80.99.0-imi, 0206.90.99.0-imi aamma 0210.90.11.0-imi, 0210.90.19.0-imi aamma 0210.90.60.0-imi kg.-imut: 25 kr. 00 øre.

b) Nioqqutissat allat, piariikkat imaluunniit aqerlortikkat, savaaqqat savallu neqaannit nioqqutissiat, nioqqutissat allattorsimaffianni 1602.10.00.0-imi, 1602.90.71.0.10-mi aamma 1602.90.79.0.10-mi

allassimasut kg.-imut: 25 kr. 00 øre.”

3. § 1, imm. 1-imi nr. 14, 15 aamma 17 atorunnaarsinneqarput.

4. § 3 a, imm. 3, ima oqaasertaqarpoq:

” Imm. 3. Imm. 1 aamma 2 naapertorlugit neqinik agguinissamut atortorissaarutit inuussutissalerinermut inatsisit atuuttut naapertorlugit inuussutissanik nakkutilliinermik oqartussaasumit akuerineqartussaapput.”

5. § 8 ima oqaasertaqarpoq:

” § 8. Unioqutitsineq akitsuutip akilinnitsoorneqartup marloriaataanit annerusumik akiliisitsinermik kinguneqassanganneqanngippat aamma arsaarinnissuteqartoqassanganneqanngippat, akileraaruseriffiup pineqartoq nalunaarfigisinnaavaa suliassaq eqqartuussinertaqanngitsumik naammassineqarsinnaasoq, unioqutitsisoq unioqutitsisimalluni nassuerpat akiliisitsissutissarluni nalunaarutigineqartoq, tak. § 4, piffissaliussaq erseqqinnerusumik taaneqartoq, qinnuteqarnikkut sivitsorneqarsinnaasoq qaangiutsinnagu akilerumallugu piareersimappat, aammalu nioqutissat arsaarinnissutigineqarnissaat piareersimaffigippagu.

Imm. 2. Umiarsuarni timmisartuniluunniit nunanut allanut angalasartuni inuttaasunut, inunnullu nunami maani najugaqavissuunngitsunut tunngatillugu akileraaruseriffiup pillaatitut akiliisitsissutissaq akitsuutillu akilerneqarnissaat kiisalu aamma arsaarinnissuteqarnissaq pillugit aalajangiigallarsinnaavoq. Aalajangiiffigineqartup aalajangiineq pillugu nalunaarfigineqarnermi kingorna ullut 14-it qaangiutsinnagit piumasarisinnaavaa, aalajangiineq eqqartuussisunut suliassanngortinneqassasoq. Aalajangiineq eqqartuussisunut suliassanngortitsisinnaaneq, taamaaliornissamullu piffissarititaasoq pillugit paasissutissamik imaqassaaq. Suliassap eqqartuussisunut suliassanngortinneqarnera akileraaruseriffimmit isumagineqassaaq. Pineqartup suliassamik eqqartuussisunut suliassanngortitsinissamik piumasaqarnermigut, eqqartuussisunit aalajangiisoqarserlugu, akileraaruseriffiup aalajangiineranik malinnittusnaanini avaqqussinnaanngilaa.

Imm. 3. Kalaallit Nunaanni pineqaatissiissuteqarnissamut unnerluussuteqartarnermut aalajangersakkat eqqartuussisarnermi inatsimmi kap. 38-miittut, nalunaarummut imm. 1-imi taaneqartumut tunngatillugu atorineqarsinnaapput.

Imm. 4. Qanoq iliuuseqartoqaaqqissanngilaq:

- 1) akiliisitsissut piffissaagallartillugu akilerneqarpat, aalajangerneqarnermiluunniit kingorna akiliisitsiniarnikkut akilersinneqarpat, aamma
- 2) nioqutissat arsaarinnissutigineqarpata.

Imm. 5. Akiliisitsissutit Nunatta Karsiata pisassarai.

Imm. 6. Arsaarinnissutit Nunatta Karsianut iluaqutissanngortinneqassapput.”

6. § 9 atorunnaarsinneqarpoq.

Namminersorlutik Oqartussat, ulloq 20. novembari 2023

Múte Bourup Egede (atsior.)

Naalakkersuisut Siulittaasuat

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut